

Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ԽՈՍՔԸ «ԼԱՎԱԳՈՒՅՆ ՈՒՍՈՒՑԻՉ» ՀԱՆՐԱՊԵՏԱԿԱՆ ՍՐՑՈՒՅԹԻ
ՍՐՑԱՆԱԿԱՔԱՇԽՈՒԹՅԱՆ ՀԱՆԴԻՍՈՒԹՅԱՆԸ

(12 դեկտեմբերի 2017 թ.)

Գերաշնորհ, հոգեշնորհ եւ արժանապատիվ Հայրեր,
Հայաստանի Հանրապետության կրթության եւ գիտության մեծարգո
նախարար տիար Լեւոն Մկրտչյան,
Ազգային ժողովի հարգարժան պատգամավոր տիկին Ռուզաննա Մու-
րադյան, վարչական պատասխանատու ներկայացուցիչներ,
Սիրելի ուսուցիչներ, կրթության նվիրյալներ եւ հյուրեր.

Ուրախությամբ ողջունում ենք ձեզ Մայր Աթոռ Սուրբ Էջմիածնի՝
հոգեւոր մեր տան նվիրական հարկի ներքո: Դարձյալ մեկտեղվել ենք
մրցանակներ հանձնելու «Լավագույն ուսուցիչ» ամենամյա մրցույթի
հաղթողներին: Այս գեղեցիկ հանդիսությունն արդեն դարձել է բարի
ավանդույթ եւ բոլորիս համար հոգեւոր խանդավառության բերկրալի
առիթ, քանզի մրցանակաբաշխությունը կոչված է վերարժեւորելու մեր
մատաղ սերնդի կրթությանն ու դաստիարակությանը նվիրված ուսու-
ցիչների աշխատանքը, նաեւ՝ գնահատելու, քաջալերելու մեր ուսուցիչ-
ներին իրենց պատասխանատու եւ նվիրական առաքելության մեջ:

Աստվածաշնչյան ժողովողն ասում է. «Մարդու իմաստությունը լույս
է տալիս նրա երեսին» (Ժող. Ը. 1): Սուրբգրային խոսքի շնորհընկալ-
ներն այսօր դուք եք, սիրելի՛ ուսուցիչներ, որ հարստացած գիտելիքնե-
րով եւ հոգու իմաստությամբ՝ լույս եք տալիս ձեր սաներին, ձեր կողմից
կրթվող ու դաստիարակվող սերունդներին, որպեսզի նրանք եւս լուսա-
վորվեն, ճանաչեն կյանքի իմաստը, առաջնորդվեն հոգեւոր արժեքներով
եւ կարողանան հաղթահարել իրենց առջեւ բարձրացող խնդիրներն ու
փորձությունները: Այսօրվա արագորեն զարգացող եւ փոփոխվող աշ-
խարհում ուսումնի ու կրթությանը, նկարագրի, անհատականության
ձեւավորումը առաջնահերթ են ազգի եւ պետության համար: Արդ, դուք՝
խոնարհ ու պարզ սպասավորներդ գիտության եւ կրթության, ձեր մտա-
յին ու հոգեւոր իմաստության լույսով ի գորու եք առողջ եւ գորավոր
սերունդ պատրաստել, ովքեր պիտի շենացնեն մեր հայրենի երկիրն ու
ազգային կյանքը, պիտի պահպանեն մեր սահմանները եւ պիտի պաշտ-

պանեն մեր ժողովրդի իրավունքները: Մենք համոզված ենք, որ այս գիտակցությունը, այս տեսլականն ամեն օր ձեր աշխատանքում ներշնչում է ձեզ՝ հավելելով կորով ու նվիրում:

Մենք գոհունակությամբ ենք անդրադառնում, որ կրթության եւ գիտության նախարարությունը ջանում է արդիական դարձնել կրթութ-յունը մեր երկրում, նաեւ՝ արժանի կերպով գնահատել մանկավարժնե-րի աշխատանքը: Ուրախ ենք, որ ամրանում է մեր Եկեղեցու եւ նախա-րարության համագործակցությունը՝ ի նպաստ մեր զավակների հոգեւոր ճանաչողության, նրանց հոգում հավատքի սերմանման, որպեսզի ընթա-նան ճշմարիտ ուղիով, լինեն արժանավոր զավակները մեր երկրի ու ժո-ղովրդի: Լինել երջանիկ ազգ՝ ծաղկուն պետությամբ եւ ազգային կյան-քով. սա պիտի լինի նաեւ մեր կրթության նպատակը:

Հայրապետական Մեր գնահատանքն ենք բերում ՀՀ կրթության ու գիտության նախարարությանը եւ անձամբ նախարար տիար Լեւոն Մկրտչյանին, ով սիրով աջակցում է մեր Եկեղեցու նախաձեռնություն-ներին: Մեր գնահատանքը՝ Գերաշնորհ Տ. Վարդան եպս. Նավասարդյա-նին եւ նրա բարեջան ղեկավարությամբ գործող Քրիստոնեական դաս-տիարակության կենտրոնի աշխատակիցներին ու բոլոր պատասխանա-տուններին, ովքեր կազմակերպում են այս մրցանակաբաշխությունը:

Այս ուրախ առիթով Հայրապետական Մեր օրհնությունն ու գնահա-տանքն ենք հայտնում մրցանակաբաշխության ազնիվ բարերարներ Իրմա եւ Սիլվիա Տեր-Ստեփանյաններին, որ ամենայն նվիրվածությամբ տարի-ներ շարունակ, հավատարիմ իրենց ծնողների պատգամին եւ օրինակին ու կարեւորելով ուսուցչի դերակատարությունը ազգային եւ հայրենա-կան մեր կյանքում՝ աջակցում են այս ծրագրին: Մաղթում ենք, որ ամե-նաբարին Աստված օրհնի մեծազնիվ բարերարներին ու վարձահատույց լինի իրագործած եկեղեցանվեր եւ ազգանվեր գործերի համար:

Մեր օրհնությունն ու գնահատանքն ենք բերում ձեզ, սիրելի՛ ման-կավարժներ եւ կրթության բնագավառի պատասխանատուներ՝ հայցելով Աստծո ամենախնամ հովանին եւ առաջնորդությունը ձեր կյանքին ու նախանձախնդիր ջանքերին, որ սիրով եւ նվիրումով ներդնում եք մեր զավակների կրթության գործում:

Աղոթքով առ Աստված հայցում ենք, որ լուսավոր պահի միտքն ու հոգին մեր երեխաների, նոր կորով ու եռանդ պարգեւի ձեզ եւ արդյու-նավոր ջանքեր՝ ի նպաստ ազգային մեր բոլոր կրթօջախների օրավուր բարգավաճման ու պայծառացման:

Տիրոջ սերը, անսպառ օրհնություններն ու շնորհները թող լինեն ձեզ հետ եւ համայն մեր ժողովրդի՝ այսօր եւ միշտ. ամեն:

